

CLWB MYNYDDA CYMRU – CYFARFOD BLYNYDDOL 2022

ADRODDIAD - YSGRIFENNYDD CYFFREDINOL

Cynhaliwyd tri chyfarfod arferol o'r Pwyllgor yn ystod y flwyddyn sef yn mis Ionawr, Mai a Medi ac fel y llynedd fe'u cynhaliwyd i gyd drwy gyfrwng Zoom. Mae'r drefn o ddefnyddio Zoom i gynnal ein cyfarfodydd yn gweithio'n dda ac mae'n caniatáu i aelodau sy'n byw ym mhob rhan o Gymru gan gynnwys lolo ap Gwynn yn ardal Aberystwyth a Dewi Hughes yng Nghaerdydd ymuno â'r cyfarfodydd yn eitha rhwydd.

Yn amlwg un o brif gyfrifoldebau'r Pwyllgor yw cadw llygaid ar faterion ariannol y Clwb ac rydym yn derbyn diweddariad gan y Trysorydd ym mhob cyfarfod. Ym mis Mai ystyriwyd y posibilrwydd o newid cyfrif Banc y Clwb o HSBC i fanc arall yn deillio o benderfyniad y banc hwnnw i ddechrau codi tâl am drafodion. Ar ôl ystyried y mater penderfyniad y Pwyllgor oedd y dylid aros efo HSBC.

Hefyd fe ystyriwyd os y gellid derbyn taliadau i gyfrif banc y Clwb trwy ddebyd uniongyrchol a fyddai'n gwneud y trefniadau gweinyddol yn fwy rhwydd. Wedi i'r Trysorydd ymchwilio i hyn fe welwyd y byddai'n rhaid defnyddio asiant i weithredu'r drefn ar ein rhan. Cafodd wybodaeth am nifer o gwmnïau ond nid oedd unrhyw un yn cynnig gwasanaeth drwy gyfrwng y Gymraeg. Penderfyniad y Pwyllgor felly oedd y byddai i'r Clwb weithredu unrhyw drefn o ddefnyddio debyd uniongyrchol drwy gyfrwng y Saesneg yn groes i egwyddorion sylfaenol y Clwb ac na fyddai gwneud hynny yn dderbyniol.

Fe gofiwch efallai y cytunwyd yn y Cyfarfod Blynyddol y llynedd i gynyddu tâl aelodaeth y Clwb i £25 o Ionawr 2023. Bydd y cynnydd yn cael ei ddefnyddio i gwrdd â'r cynnydd yn nhâl aelodaeth y Clwb i'r CMP sydd wedi datgan eu bwriad i gynyddu eu ffioedd i aelodau clybiau hefo chwyddiant yn flynyddol. Bydd yn codi i £22.25 ym mis Ionawr 2023. Yn amlwg mae cynnydd pellach i ddod a bydd yn rhaid i ni gadw llygad ar gyfraniadau'r Clwb i'r CMP i'r dyfodol ond gobraith y Pwyllgor yw y gellir cadw'r tâl aelodaeth yn £25 cyhyd â phosibl.

Ym mis Mai ymunodd Sian Williams, Swyddog Gwirfoddoli y Bartneriaeth Awyr Agored â chyfarfod y Pwyllgor i roi cyflwyniad byr i'r aelodau am newidiadau yn y ffordd y bydd y Bartneriaeth yn gweithredu yn y dyfodol. Cafwyd gwybod y bydd angen i glybiau dalu tâl aelodaeth o £150 y flwyddyn os am geisio am gefnogaeth ariannol i'w haelodau fynychu unrhyw gyrsiau drwy'r Bartneriaeth ac mai £500 fyddai'r uchafswm ar gael yn flynyddol fel cymorth i aelodau unrhyw glwb. Cytunwyd fod budd i aelodau'r Clwb fynychu cyrsiau ar gael drwy'r Bartneriaeth ac y dylid ymaelodi a lledaenu'r wybodaeth ymysg yr aelodau fod y cymorth i fynychu cyrsiau ar gael.

Cynhaliwyd yr Eisteddfod Genedlaethol eleni yn Nhregaron, y gyntaf ers y clo. Roedd Dwynwen wedi trefnu i Garadog Jones roi Darlith Goffa Llew Gwent ar gyfer Eisteddfod 2020 ac felly wedi hir ddisgwyl llwyddwyd i'w chynnal eleni. Teitl y ddarlith oedd "Elfen am Antur" ac roedd yn hynod o lwyddiannus gyda Phabell y Cymdeithasau yn orlawn ar ei chyfer. Diolch yn fawr i Dwynwen am yr holl waith trefnu. Hefyd fe gynhaliwyd taith goffa Gareth Pierce gan y Clwb yn ystod wythnos yr Eisteddfod gyda 44 yn ymuno â thaith "Llynnoedd Teifi" ar y 3ydd o Awst dan arweiniad Dafydd Pugh Jones.

Roedd yn dda gweld hefyd fod y Clwb wedi ail afael ar drefnu ymweliadau â'r Alban ar ôl y cyfnodau clo ac fe gafwyd dau ymweliad llwyddiannus eleni yn ystod mis Chwefror a mis Mai.

Os oes diddordeb gennych mae cofnodion cyfarfodydd y Pwyllgor a rhai'r Cyfarfodydd Blynyddol i'w gweld ar wefan y Clwb, gweler y ddolen isod:

<http://www.clwbmynyddacymru.com/Dogfennau.htm>

Bydd angen i'r Cyfarfod Blynyddol gadarnhau aelodaeth y Pwyllgor ar gyfer 2023. Mae aelodaeth bresennol y Pwyllgor fel a ganlyn:

Dwynwen Pennant – Cadeirydd
Steve Williams – Is-gadeirydd
Dilys Phillips – Trysorydd
Eryl Owain – Ysgrifennydd Gweithgareddau
Iolo ap Gwynn – Ysgrifennydd y Wefan
Iolo Roberts – Ysgrifennydd Cyffredinol
Richard Roberts
Iona Evans
Dewi Hughes
Elen Huws
Raymond Griffiths
Sioned Ll Jnes
Keith Roberts

Yn ôl y cyfansoddiad bydd traean aelodau'r Pwyllgor (yr ymddiriedolwyr) yn ymddeol yn flynyddol, sef 4 aelod, er bod hawl i unrhyw un ohonynt gael ei ail-benodi. Y rhai sydd i ymddeol yw'r rhai sydd wedi gwasanaethu hiraf, sef

Iona Evans
Iolo ap Gwynn
Iolo Roberts
Eryl Owain

Fe adroddir ar y sefyllfa ddiweddaraf ar aelodaeth cyffredinol y Pwyllgor yn y Cyfarfod Blynyddol. **Mae'n agored i unrhyw aelod wasanaethu ar y Pwyllgor drwy gysylltu â'r Ysgrifennydd Cyffredinol cyn y Cyfarfod Blynyddol.**

Bydd dau newid sylfaenol pellach yn digwydd i aelodaeth y Pwyllgor a rhediad y Clwb eleni. Yn gyntaf bydd cyfnod Dwynwen fel ein Cadeirydd yn dod i ben ac mawr yw ein diolch iddi am ein harwain dros y ddwy flynedd diwethaf ar gyfnodau a oedd ar rai adegau yn anodd iawn. Bydd Steve yn cymryd y gadair yn y Cyfarfod Blynyddol. Un o Fethesda yw Steve yn gweithio i'r Gwasanaethi Gyrfaoedd ac yn fynyddwr brwd yn manteisio ar unrhyw gyfle i fynd am yr Alban i ddringo'r Munros. Dwi'n sicr y byddwn mewn dwylo cadarn gyda Steve yn ein harwain dros y ddwy flynedd nesaf.

Gyda Steve yn cymryd y gadair mae swydd yr Is-gadeirydd yn wag. Mae Elen Huws, sydd wedi bod yn aelod ffyddlon o'r Clwb ers nifer o flynyddoedd (ac wedi llwyddo i gwblhau'r Munros eleni), wedi cytuno i'w henw gael ei roi ymlaen i'r Cyfarfod. Dwi'n sicr y bydd pawb yn gytun bod Elen yn ymgeisydd delfrydol ar gyfer y swydd yma.

Hefyd efallai y cofiwch i Eryl, yn y Cyfarfod Blynyddol yn 2021, fynegi ei fwriad i roi'r gorau i'w swydd fel Ysgrifennydd Gweithgareddau yn y Cyfarfod Blynyddol eleni wedi deng mlynedd o drefnu. Dwi'n sicr ein bod i gyd yn gwerthfawrogi'r holl waith caled mae Eryl wedi ei wneud tros y blynyddoedd. Yn sicr dw i wedi gweld ei e-byst rheolaidd yn ein hatgoffa o'r teithiau yn ddefnyddiol tu hwnt. Bydd colled ar ei ôl. Fodd bynnag rhaid i ni yn amlwg barchu penderfyniad Eryl ac rydym wedi bod yn chwilio am olynydd.

Mae Richard Roberts wedi datgan ei fod yn fodlon i'w enw gael ei roi gerbron y Cyfarfod Blynyddol i gymryd yr awenau ac rydym yn hynod o ddiolchgar iddo am gytuno i wneud hynny. Dwi'n sicr y bydd Richard yn olynydd teilwg i Eryl.

Nid oes siaradwr gwadd eleni rhwng y cyfarfod a'r cinio ond byddwn yn manteisio ar y cyfle i roi dangosiad sydyn o sut i ddefnyddio'r diffibriliwr symudol sy'n cael ei gario gan arweinyddion ar deithiau'r Clwb bellach. Mae nifer wedi dweud eu bod erioed wedi gweld yr offer yn cael ei ddefnyddio ac felly rydym yn defnyddio'r cyfle i gael dangosiad sydyn drwy law Dwynwen a Sioned.

Llawer o ddiolch am eich sylw a mawr obeithio y cewch i gyd gyfle i droedio mynyddoedd Cymru a thu hwnt (ar weithgareddau'r Clwb ar adegau gobeithio) dros y flwyddyn i ddod.

Iolo P Roberts
Ysgrifennydd Cyffredinol
Tachwedd 2022